

दिनांक 26.08.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- ☐ प्रधानमंत्री नरेन्द्र मोदी कह्यो-भारत पर्यावरण अनुकूल परिवहन रा हलका मांय तेजी ऊं आगे बध रह्यो हैं
- ☐ विधानसभा रा पावस सत्र ऊं पैली 28 अगस्त ने सगळी पार्टियां री मीटिंग बुलायी जावेलां
- ☐ लोकसभा अध्यक्ष ओम बिरला घणी बरसात रा असर वाळा कोटा-बूंदी हलका मांय हालात रो जायजो लीनों
- ☐ आरपीएससी अनुचित साधनां री मदद ऊं नौकरी हासिल करण वाळा 415 जणा माथे ताउम्र भर्ती परीक्षावां देवण माथे पाबंदी लगायीं

000

प्रधानमंत्री नरेन्द्र मोदी आज गुजरात मांय टीडीएस लिथियम आयन बैटरी बणावण रा कारखाना मांय **हाईब्रिड बैटरी इलेक्ट्रोड** बणावण रा काम रो उद्घाटन कीनों ई पाछे राख्यी ज्यी जनसभा मांय वे कह्यो के इण ऊं देश री **मेक इन इंडिया** यात्रा मांय नुवो पन्नो जुड़ रह्यो हैं श्री मोदी कह्यो के ओ मौको भारत अर जापान बीचे दोस्ताना रिश्ता ने नुवी दिशा देवेलां

.....

श्री मोदी कह्यो के भारत कने लोकतंत्र री ताकत है, काम करण वाळा नौजवानां री मोटी तादाद है अर बड़ी संख्या मांय होशियार कामगार ई हैं इण ऊं पैली वे आज गुजरात रा हंसलपुर ऊं देश मांय बणायी ज्यी बैटरी ऊं चालण वाळी गाड़ी **ई-विटारा** ने झंडी बतायीं वे सुजुकी मोटर्स रा कारखाना मांय लगायी ज्यी प्रदर्शनी ई देखीं सोशल मीडिया रे जरिये करी ज्यी एक पोस्ट मांय प्रधानमंत्री कह्यो के भारत खुद रे पाण ऊबो व्हेवण अर पर्यावरण अनुकूल परिवहन रा हलका मांय तेजी ऊं आगे बध रह्यो हैं

000

प्रधानमंत्री नरेन्द्र मोदी रो ई महीना री 28 तारीख ने जापान रा दौरा सारू जावण रो कार्यक्रम हैं विदेश सचिव विक्रम मिश्री आज नई दिल्ली मांय खबरनवीसां ने आ जाणकारी दीनीं वे बतायो के श्री मोदी 29 अर 30 अगस्त ने जापान रा प्रधानमंत्री शिगेरु इशिबा सागे व्हेलां वे जापान मांय 15 वां भारत-जापान वार्षिक शिखर सम्मेलन मांय शामिल व्हेलां

000

गृह मंत्री अमित शाह कह्यो है के वाइब्रेंट विलेज कार्यक्रम रे मार्फत गांवां मांय नौकरी-धंधा रा मौका बधावण, बुनियादी ढांचा विकास अर संस्कृति ने बचावण री कोशिसां करी जा रही हैं वे आज नई दिल्ली मांय वाइब्रेंट विलेज कार्यक्रम रा बारा मांय राख्यी ज्यी कार्यशाला रा उद्घाटन सत्र मांय बोल रह्या हां दो दिन री आ कार्यशाला गृह मंत्रालय रा सीमा प्रबंधन विभाग री ओर ऊं राख्यी ज्यी हैं गृह मंत्री कह्यो के तीन खास बिन्दुआं माथे आधारित ई कार्यक्रम रे जरिए सरहद ऊं लाग्योड़ां गांवां ऊं लोगां ने दूजी ठौड़ जावण ऊं रोकण, गांव रा हर रहवासी ने सरकारी योजनावां रो फायदो दिरावण अर सीमा अर राष्ट्रीय सुरक्षा ने मजबूत करण सारू गांवां ने सशक्त तंत्र रा तौर ऊं विकसित कर्या जावेलां

000

मुख्यमंत्री भजन लाल शर्मा जनता रा नुमाइन्दां ऊं विकसित राजस्थान रो संकल्प सांचो करण सारू सक्रिय भूमिका निभावण बाबत् कह्यो हैं वे आज नागौर, जोधपुर, बाड़मेर, जालौर, सिरोंही अर पाली संसदीय हलकां रा जनता रा नुमाइन्दां सागे बातचीत कर रह्या हां मुख्यमंत्री रा रहवास माथे आज दूजा दिन ई सांसद-विधायक संवाद रो सिलसिलो चाल्यो श्री शर्मा केन्द्र अर राज्य सरकार री

जनता रा भला सारू चलायी जा रही योजनावां री जाणकारी अर फायदो जनता ताई असरदार तरीका ऊं पूगावण सारू कह्यो संवाद कार्यक्रम मांय केन्द्रीय मंत्री गजेन्द्र सिंह शेखावत ई मौजूद रह्यां

000

16वीं विधानसभा रो पावस सत्र एक सितम्बर ऊं सारू व्हेलां संसदीय कार्यमंत्री जोगाराम पटेल खबरनवीसां ने आ जाणकारी दीनीं वे कह्यो के सत्र रे दौरान सरकार केई बिल पेश करेलां श्री पटेल बतायो के सत्र री सुरुआत ऊं पैली 28 अगस्त ने सगळी पार्टियां री मीटिंग बुलायी ज्यी हैं

.....

000

पुलिस महानिदेशक राजीव कुमार शर्मा आज उदयपुर कने खेरवाड़ा मांय पुलिस जवानां री सम्पर्क सभा ने सम्बोधित कीनीं पुलिस ट्रेनिंग स्कूल मांय राख्यी ज्यी ई संपर्क सभा मांय जवान डीजीपी ने वां री समस्यावां री जाणकारी दीनीं डीजीपी जवानां ने समस्यावां रो हल करण रो भरोसो दिरायो ई दौरान उदयपुर रेंज रा आईजी गौरव श्रीवास्तव ई मौजूद रह्यां

.....

000

प्रदेश मांय ऊगणी हलकां समेत न्यारी-न्यारी ठौड़ां भारी बारिश रो दौर मंदो पड़ जावण ऊं थोड़ी साता मिली हैं मौसम विभाग रे मुजब आज भरतपुर अर जोधपुर जिलां मांय हल्की ऊं मझला दर्जा री बिरखा व्हेवण रा आसार हैं महकमो 16 जिलां सारू बिरखा रो येलो अलर्ट जारी कीनो हैं ई बीच आज सिरौही अर हनुमानगढ़ मांय केई ठौड़ां बिरखा व्हेवण रा समाचार हैं

000

लोकसभा अध्यक्ष ओम बिरला वां रा संसदीय हलका कोटा-बूंदी मांय बरस्या जोरदार मेह पाछे उपजा हालात रो जायजो लेवण सारू आज अहलकारां सागे मीटिंग कीनीं ई पाछे खबरनवीसां सागे बातचीत करता थकां श्री बिरला कह्यो के हलका मांय पाणी भरण रा कारणां री ठा कर र आवता बगत मांय वां ने आगा करण री कोशिसां करी जावेलं

.....

000

प्रदेश मांय चलायी जा रही वरिष्ठ नागरिक तीर्थ यात्रा योजना रा तैत तीरथ माथे जावण वाळां री आज जयपुर मांय लॉटरी निकाळी ज्यी जिला रा प्रभारी मंत्री जोगाराम पटेल अर देवस्थान मंत्री जोराराम कुमावत लॉटरी निकाळी ई रे जरिये जिला ऊं 4 हजार 900 ऊं बत्ता जातरू तीरथ सारू चुणी ज्यां सलूमबर मांय ई लॉटरी निकाळ र ई योजना रा तैत चालू माली साल मांय तीरथ सारू जावण वाळा 463 जातरू चुणी ज्यां देवस्थान विभाग रे मुजब प्रदेश मांय सब ऊं बत्ती अर्जियां नेपाल रा काठमाण्डू मांय पशुपतिनाथ मन्दिर रा तीरथ सारू हवाई सफर री मिलीं

000

संस्कृत विषय रा चार वरिष्ठ अध्यापकां ने फ़र्जी सर्टिफिकेट रे मार्फत नौकरी हासिल करण रा आरोप मांय नौकरी ऊं निकाळ दिया ज्या हैं संस्कृत शिक्षा विभाग रा निदेशालय री ओर ऊं जारी हुकम रे मुजब साल 2022 मांय व्ही प्रतियोगी परीक्षा मांय निशक्तजन श्रेणी मांय गलत तरीका ऊं नौकरी हासिल करण पाछे वां ने ई नौकरी सारू अपात्र मानी ज्या हैं शिक्षा मंत्री मदन दिलावर कह्यो है के भर्तियां मांय भ्रष्टाचार बर्दाश्त नी कर्यो जावेलं वे कह्यो के भर्ती री चयन प्रक्रिया मांय गलत तरीका इस्तेमाल कर र सरकारी नौकरी हासिल करण वाळा ने नौकरी ऊं निकाळ्या जावेलं

000

राजस्थान लोक सेवा आयोग-आरपीएससी अनुचित साधनां ऊं नौकरी हासिल करण वाळा 4 सौ 15 जणा माथे ताउम्र भर्ती परीक्षावां मांय बैठण माथे रोक लगा दीनी हैं ई रे अलावा 109 उम्मीदवारां ने 1 ऊं 5 साल ताई प्रतियोगी परीक्षावां देवण ऊं रोक दिया ज्या हैं आं मांय राज्य रा न्यारा-न्यारा जिला मांय भर्ती परीक्षावां मांय फ़र्जी कागजातां अर फ़र्जी दिव्यांगता प्रमाण-पत्र इस्तेमाल करण वाळा उम्मीदवार शामिल हैं

राज्यपाल हरिभाऊ बागडे राज्य ने भणार्ई-लिखाई रा हलका मांय अगाडी बणावण माथे जोर दीनो हैं श्री बागडे विश्वविद्यालयां मांय आला दर्जा री भणार्ई-लिखाई री गुणवत्ता अर नुवी शिक्षा नीति लागू करण रा बारा मांय जयपुर रा राजभवन मांय राखी ज्यी मीटिंग मांय बोल रह्या हां राज्यपाल कह्यो के विश्वविद्यालयां मांय भणार्ई-लिखाई ने और बेहतर बणावण सारू काम कर्यो जावणो चाहिजें वे कुलगुरुआं ऊं कक्षावां मांय विद्यार्थियां री हाजिरी तैय करण अर नौकरी दिरावण मांय मददगार कोर्स चलावण बाबत् कह्यो

000

पंचायतीराज मंत्री मदन लाल दिलावर कह्यो है के विलायती बबूल ने असरदार तरीका ऊं खत्म करणो जरूरी हैं श्री दिलावर आज जयपुर मांय विलायती बबूल ने खत्म करण रा बारा मांय वन विभाग अर ग्रामीण विकास विभाग रा अहलकारां सागे वही मीटिंग मांय बोल रह्या हां वे कह्यो के विलायती बबूल आरे-सारे री मिट्टी ने खराब कर देवे है ज्यी कारण दूजा पेड़ पौधा विकसित नी व्हे सके हैं मीटिंग मांय ईंधन, चारकोल अर ढांढां रा आहार रा बारा मांय ई चर्चा करी ज्यी

000

बालोतरा ज़िला री गायां मांय एकर फेर ऊं लम्पी बीमारी रो असर निजर आवण लाग्यो हैं कल्याणपुर तहसील मांय लम्पी बीमारी रा 58 मामला सामी आया हैं पशुपालन विभाग सावचेती राखता थकां नोडल टीमां बणायी ज्यी है अर मोबाइल यूनिट ने सावचेत कर दीरीजी हैं

000

जयपुर फौजी टेशन मांय आवा सप्ताह समारोह रा तैत फौज़ियां रा पिरवार वाळां सारू गैर सरकारी हलका मांय भर्ती रो अभियान चलायी ज्यो आर्मी वेलफेयर प्लेसमेंट ऑर्गनाइजेशन रा निदेशक कर्नल राजेश भूकर बतायो के इण मांय फौज़ियां री बीबियां, वीरांगनावां अर बच्चा शामिल व्ह्यां

000